

## YR YSTWYLL 6

2 BRENHINOEDD 5:1-14; SALM 30;  
1 CORINTHIAID 9:24-27; MARC 1:40-45

---

---

### ● Gweddi agoriadol

Bendithia bawb a ddaeth ynghyd  
yma heddiw i addoli.

Bendithia'r rhai sy'n arwain  
a'r rhai sy'n gwasanaethu.

Bendithia'r rheini sy'n gryf  
a'r rheini sy'n wan.

Bendithia'r rheini sy'n ifanc  
a'r rheini sy'n hen.

Bendithia bawb a ddaeth ynghyd  
i addoli yma heddiw.

### ● Moliant

Deui atom  
mewn ffyrdd annisgwyl,  
gan ddod â iechyd,  
llawnder  
ac adferiad  
mewn corff, meddwl ac enaid.

Nid mewn perth yn llosgi  
na fflach mellten  
na rhu taran,  
ond mewn gair tawel,  
tynerwch  
a chyffyrddiad iachusol.

Boed i'n calonnau ddatgelu  
parodrwydd  
i anwylo tawelwch,  
clywed dy sibrwd  
a deall mwy  
ar dy gariad,  
dy ras, dy wirionedd.

● **Cyffes**

Atat ti yn unig y down,  
Waredwr,  
Iachawdwr,  
Offeiriad a Brenin,  
gan ymddiried yn dy ras  
a'th barodrwydd i faddau.  
Atat ti yn unig y down,  
dan bwysau  
baich ein pechod,  
yn gaeth,  
heb geisio dim ond rhyddhad.

Atat ti yn unig y down,  
Waredwr,  
Iachawdwr,  
Offeiriad a Brenin,  
fel bo'n calonnau  
yn cael eu cyffroi i wasanaethu  
ac nid i fod yn llonydd.

● **Diolch**

Pan fo ein calonnau yn drwm,  
a'r corff yn wan,  
bywyd wedi'i lenwi â thristwch,  
a'r ysbryd yn isel;  
pan fo dyddiau yn unig,  
yn dywyll dan gwmwl,  
a heulwen yn methu  
torri trwodd;  
diolch am y sicrwydd  
nad wyt ti  
byth ymhellach  
nag y gall  
gweddi sibrwd ei gyrraedd,  
byth yn nes  
na phan fyddwn wedi blino  
ac ar ein gliniau.